


Minister Mike de Meza:

Green Aruba IV y CREF ta encera diferente discusion riba topiconan tecnico, financiero y economico pa cu energia berde



ORANJESTAD (AAN): Di aranson awor dia 9 di October ta tuma luga e di cuater conferencia Green Aruba na Westin Resort, sigui pa CREF – Caribbean Renewable Energy Forum, riba diano 10 y 11 di October. Minister Ing. Mike de Meza di Finansa, Comunicacion, Utilidad y Energia den nomber di Gobierno di Aruba ta anfitrión di e reunionnan aki, cual ta encera diferente discusion riba topiconan tecnico, financiero y economico pa cu proyectonan di energia berde.

E mandatario ta extende un invitacion na tur persona, di hoben pa pensionado, kende ta interesa den informacion tocante energia sostenibel, incluyendo e proceso andando na Aruba, e oportunidadnan pa inversion y Aruba 2020 en general pa registra pa medio di e website www.greenaruba.org y participa na Green Aruba IV.

Minister Ing. Mike de Meza a expresa cu e ta hopi orguyoso di presenta e di cuater reunion Green Aruba, cual den pasado tabatin como oradornan invita algun experto impresionante y di renombre mundial manera Vice Presidente di Merca Al Gore y Rey Willem-Alexander, como tambe e co-fundador di Carbon War Room Richard Branson. E ultimo aki a tene un intercambio cu Aruba pa medio di videoconferencing durante Green Aruba III.

E aña aki Green Aruba tin como tema “Our Road to 2020”. Gobierno di Aruba tin como vision pa nos isla no depende mas riba energia cu ta procedente di “fossil fuel” pa e desalinisacion di awa y produccion di coriente pa aña 2020. Aruba ta pasando pa un desaroyo hopi grandi pa loke ta trata energia sostenibel y tin diferente oportunidad pa



inversion den e proceso aki, cual tambe lo worde discuti durante Green Aruba y CREF.

Minister Ing. Mike de Meza a splica cu expertonan riba e nivelnan mas halto na mundo lo ta presente na CREF y naturalmente tambe na Green Aruba pa scucha local Aruba tin pa presenta diaranson awo. E expertonan tambe lo contribui cu intercambio di informacion riba diferente investigacion y experimento y local ya ta worde aplica den practica caba riba e tereno di energia sostenibel, segun De Meza.

E titular di utilidad y energia a splica cu lo tin presente entre otro di Korea un Minis-

ter y e Presidente di e centro pa investigacion di “applied science”, un experto di Energy Department di Merca y di diferente universidadnan di rond mundo, profesornan cu expertisio riba e tereno di energia kende lo duna nan contribucion na Green Aruba.

Green Aruba ta hopi importante pa loke ta trata e desaroyonan riba ramo di energia na nos isla y cambionan cu ta sumamente necesario pa futuro, segun Minister Ing. Mike de Meza, kende ta encurasha tur persona interesa pa participa na e dos conferencianan y keda al tanto di tur desaroyo local, regional y den mundo.